



神奇醫生

要做到醫生唔止靠讀書叻、技術好，重要有顆仁心，做到「醫者父母心」至稱得上係位好醫生。

獸醫Dr. David，澳洲人，佢每次都曾用盡所有方法去醫好每隻送到佢手上嘅動物。就係呢份never give up嘅精神，令佢成為「神奇醫生」。

拯救袋鼠

Dr. David Coyle 1993年畢業於澳洲悉尼，然後喺獸醫診所工作咗7年。Dr. David從小已愛上動物，喺成為獸醫前嘅志願係想成為觀察野生動物嘅專家，但後來佢覺得獸醫可以救到動物嘅生命，相比之下更有意義。

喺悉尼呢7年獸醫生涯入面，最令Dr. David難忘嘅竟然係醫咗好多野生袋鼠，絕大部分袋鼠因為亂跳出馬路而被車撞傷，佢每次都盡心盡力醫治佢哋。最令Dr. David安慰嘅係好多當地居民都願意暫養康復中嘅袋鼠，等佢哋完全好番晒，再放番生去大自然。

神奇手術

喺2000年Dr. David移居香港，進駐新界嘅寵物診所工作，重被佢遇到而家嘅愛貓Bob。「有次，有個人帶住隻嚴重受傷嘅貓嚟到診所。當時我真係好驚訝，小貓前足被滾水腐蝕到血肉模糊，差啲需要進行切肢手術。而小貓主人因負擔唔起醫藥費，就咁將小貓遺棄喺診所。眼見小貓咁乖，但嗰種哀求嘅眼神，令我唔忍心佢冇咗前足，於是佢大膽咁將小貓腹部剖開咗個傷口，將受傷嘅前足放入腹部，呢個方法可以令新生肌肉伸延到前足上，令小貓可以自身填補前足上嘅肌肉。之後佢幫佢做分割手術，將前足同腹部分開。最後，手術非常成功，佢重將佢領養返屋企，幫佢改咗個名叫『Bob』。」

除咗Bob，Dr. David先後喺街執咗2隻可憐嘅流浪貓返屋企養，分別係Bonnie同Clyde。而喺2001年，同Dr. David相處十多年嘅愛貓Puss由悉尼移民到港。不幸地，Puss一到港，身體漸漸出現好多毛病，畢竟Puss已經係隻上咗年紀嘅老貓，佢同時患上7種大病——愛滋、甲狀腺問題……甚至原來有粒子彈長留喺Puss隻腳入面。Dr. David從未放棄過Puss，將所有問題逐一醫好。不過最後因為Puss真係太年老，最終有晚喺睡夢中安詳地去世，享年19歲。

通宵醫生

今年年底Dr. David被邀請到新開張位於旺角嘅24小時寵物醫院「Pets Central」內擔任獸醫總監，主理皮膚、內臟同癌症疾病。Dr. David表示，



做獸醫診症嘅時間特別長，因為動物本身唔識表達感受，所以要一段時間先可以有效斷症。Dr. David每晚都會巡房，確保留院嘅動物情況穩定，如有任何異樣立即搶救。總之，有佢呢位通宵獸醫喺度，所有動物都好似打咗支強心針一樣，定過抬油。

Dr. David每日都親自帶咗動物醫治工作
——咁專業，——咁耐性，——咁係好醫生。